



Komunikadu Imprensa
Parlamentu Nasionál
18 Juñu 2018

Deputadu eleitu sira iha lejislatura dalimak tenke dezenvolve programa nasionál lejislativu hodi asegura prioridade lejislativu iha Parlamentu Nasionál no aprova imediatamente Projeitu Lei Anti Korrupsaun

JSMP husu ba deputadu eleitu sira iha lejislatura dalimak ne'ebé simu pose iha 13 Juñu 2018, atu dezenvolve programa nasionál lejislativu no asegura prioridade lejislativu durante tinan lima no aprova Projeitu Lei Anti Korrupsaun imediatamente sein adiamentu ne'ebé la-nesesáriu.

JSMP observa katak durante períodu lejislativu sira anterior (hahú kedas desde lejislatura dahuluk to'o mai lejislatura datotuk), Parlamentu Nasionál (PN) falla atu hala'o sira nia knaar ho efektivu tanba la iha programa nasionál lejislativu ida-ne'ebé propriu hodi orienta no define prioridade lejislativu iha kada sesaun lejislativu.

Situasaun ne'e rezulta durante tinan barak PN falla atu hatuur no define prioridade lejislativu sira no depende barak liubá proposta lei sira ne'ebé mai hosi governu. Tanba ne'e, projeitu lei barak mak la konsege diskuti no aprova, inklui Projeitu Lei Anti Korrupsaun ne'ebé nu'udar parte ida hosi komprimisiu eleitorál partidu polítiku sira desde lejislatura daruak to'o mai lejislatura atuál.

“JSMP kongratula Prezidente Parlamentu Nasionál no deputadu eleitu sira iha lejislatura dalalimak ne'ebé simu ona pose atu transforma PN sai kualidade no produtividade liu no halo-tuir sira-nia komprimisiu eleitorál sira hodi aprova imediata Projeitu Lei Anti Korrupsaun hanesan prioridade ida aas liu entre projeitu lei sira seluk ne'ebé sira promete ona durante kampaña eleitorál”, dehan Diretór Ezekutivu JSMP, Luis de Oliveira Sampaio.

“Parlamentu Nasionál preziza dezenvolve programa nasionál lejislativu hodi identifika prioridade lejislativu iha sesaun lejislativu sira, se lae kumprimisiu sira ne'e sei hanesan retórica política mamuk deit no PN sei lakon ninia kredibilidade hanesan orgaun lejislativu ne'ebé nia knaar prinsipál mak atu halo lei, fiskalizasaun no desizaun polítiku tuir Konstituisaun haruka”, nia hatutan.

JSMP husu ba elementu sidadaun hotu-hotu, individualmente ka koletivamente tenke ezije deputadu sira nu'udar representante povu iha PN, kumpri sira nia komprimisiu eleitorál. Nu'udar sidadaun ita nunka bele konsiente no tolera tán atu permite polítiku sira hodi kontinua lori asuntu/materia no komprimisiu antigu/tuan sira) hanesan Projeitu Lei Anti-Korrupsaun no/ka Lei Pensaun Vitalisia iha kampaña sira iha tinan lima oin-mai. Asuntu ne'e tenke hakotu kedas iha lejislatura agora. Povu kumpri ona dever hodi hili deputadu sira ba tuur iha PN, tanba ne'e, sidadaun hotu-hotu iha direitu lejitímu no konstitusionál atu sisi (ezije) deputadu sira kumpri sira nia dever hodi jere eleitores sira nia-votu ho responsabilidade no dignifika PN hanesan orgaun soberanu Estadu nian liuhosi ezerse sira nia knaar ho efikás no responsavel.

Aleinde fó prioridade ba Projeitu Lei Anti Korrupsaun, JSMP mós husu PN atu re-ajenda, Projeitu Lei Protesaun Labarik no Lei Ordem ba Advogadu ne'ebé kaduka ona iha lejislatura datoluk no loke fali Projeitu Lei Reparasaun Nasional no Institutu Memoria Públiku hodi diskusti iha PN no asegura direitu no interese vítima sira krime pasadu nian.

Deputadu sira lejislatura dalimak nian tenke kumpri Rejimentu Parlamentu Nasionál hodi la repete iregularidade no prátika inapropriadu sira hanesan la-kumpri oras tama no sai servisu, evita halo diskusaun keta-ketak durante sesaun plenáriu sira nomós hamenus movimentu ba mai iha/durante diskusaun plenária no votasaun hanesan problema klásiku ne'ebé durante ne'e JSMP deskobre iha Parlamentu Nasionál.

Prátika sira hanesan ne'e kontribui gravemente ba qualidade no produtividade lejislativu durante períodu lejislatura daruak no dadotuk tanba la iha korum. Práktika hirak ne'e mós prejudika dignidade PN hanesan órgaun soberania Repúblika Demákratika Timor-Leste ne'ebé representa timoroan sira tomak ho mandatu no kompeténsia konstitusionál atu halo lei, halo fiskalizaun no desizaun polítika tuir artigu 92 Konstituisaun Repúblika.

Parlamentu Nasionál hahú abertura ba lejislatura dalimak no serimonia simu pose ba deputadu foun no iha tempu hanesan halao mós eleisaun ba Prezidente PN foun. Eleisaun ne'e halao ho kandidatu uníku ba Sr. Arão Noe de Jesus Amaral ne'ebé apresenta hosi partidu koligasaun AMP ne'ebé kompostu husi CNRT, PLP ho KHUNTO. Rezultadu eleisaun ne'e Sr. Arão Noe de Jesus Amaral eléitu ba Prezidente PN foun ho votu afavór 36, kontra 29 no abstein 0 hosi total deputadu na'in 65 ne'ebé marka-prezensa.

Iha nia diskursu, Prezidente PN eléitu, Arão Noe promete sei preside no organiza sesaun sira iha plenária no servisu sira iha parlamentu no husu atu deputadu sira halakon diverzénsia polítika iha kampaña eleitorál no tau aas interese nasional atu halao sira nia knaar tuir Konstituisaun.

Nia hatutan katak PN sei fó prioridade atu aprova programa V governu, proposta orsamentu jerál estadu atu asegura dezvoltamentu sustentavel. Parlamentu mós sei aprova lei prioridade sira, halo revizaun ba lei relevante sira ho baze ba interese nasional, no tau-matan ba programa governu nian ne'ebé governu sei implementa ne'ebé sei orientadu ba hadiak povu nia moris diak no transforma vida sosial ekonomika povu nian agora no ba futuro.

Atu hetan informaun liután favor kontaktu:

Luis de Oliveira Sampaio

Diretór Ezekutivu JSMP

E-mail: luis@jsmp.tl

www.jsmp.tl